

SOALAN NO: 25

**PEMBERITAHUAN PERTANYAAN DEWAN RAKYAT
JAWAPAN OLEH YB DATUK SERI DR. S. SUBRAMANIAM
MENTERI KESIHATAN MALAYSIA**

PERTANYAAN : LISAN
DARIPADA : YB PUAN RUBIAH BINTI HAJI WANG
[KOTA SAMARAHAN]
TARIKH : 24 NOVEMBER 2014
SOALAN :

YB Puan Rubiah binti Haji Wang [Kota Samarahan] minta **MENTERI KESIHATAN** menyatakan status cadangan menaik taraf kemudahan Pusat Kesihatan Bahagian Samarahan.

Tuan Yang di-Pertua,

Bahagian Samarahan mempunyai pelbagai kemudahan fasiliti kesihatan kerajaan. Setakat ini, terdapat 20 buah Klinik Kesihatan, sebuah Klinik Desa, 4 buah Klinik Kesihatan Ibu dan Anak dan 3 buah Klinik 1Malaysia yang beroperasi di keempat-empat daerah di bawah pentadbiran Pejabat Kesihatan Bahagian Samarahan.

Kementerian Kesihatan Malaysia (KKM) sentiasa memantau kualiti serta pertambahan keperluan perkhidmatan kesihatan setempat. Fasiliti kesihatan sedia ada dinaiktaraf dari segi infrastruktur, perkhidmatan,

kemudahan serta kelengkapan peralatan perubatan dan sumber manusia mengikut keperluan semasa.

Dalam RMKe-10 melalui *Rolling Plan* 1 hingga 4, Klinik Kesihatan Semera, Klinik Kesihatan Gedong dan Klinik Kesihatan Sebuyau telah diberi peruntukan bagi perluasan Program Penyelidikan dan Sokongan Teknikal, untuk kerja-kerja pembaikan dan penyelenggaraan bangunan klinik kesihatan. Kerja-kerja baikpulih dan naiktaraf Klinik Pergigian Simunjan juga telah mendapat peruntukan menaiktaraf, mengubahsuai dan penambahbaikan fasiliti kesihatan.

Pihak KKM juga telah memajukan permohonan untuk menaiktaraf Klinik Desa Kedup kepada klinik kesihatan, yang akan mempunyai skop perkhidmatan kesihatan yang lebih luas. Di samping itu, perancangan pembangunan klinik kesihatan untuk Rancangan Malaysia Ke-11 turut menyenaraikan klinik-klinik di Bahagian Samarahan dalam senarai keutamaan seperti pembinaan Klinik Kesihatan Serian dan Klinik Kesihatan Sebuyau.

KKM akan terus memantau keperluan bagi menyediakan klinik-klinik kesihatan di Bahagian Samarahan. KKM sedang di peringkat mengenalpasti projek-projek menaiktaraf klinik kesihatan serta pembinaan klinik kesihatan baru untuk dilaksanakan dalam RMKe-11 yang akan datang.

**PEMBERITAHUAN PERTANYAAN
DEWAN RAKYAT, MALAYSIA**

PERTANYAAN : LISAN

TARIKH : 24 NOVEMBER 2014
[ISNIN]

DARIPADA : Y.B. TUAN WONG TIEN FATT @ WONG NYUK FOH
[SANDAKAN]

SOALAN :-

Y.B. TUAN WONG TIEN FATT @ WONG NYUK FOH [SANDAKAN] minta **MENTERI KESEJAHTERAAN BANDAR, PERUMAHAN DAN KERAJAAN** menyatakan adakah Kerajaan merancang untuk memperkenalkan satu skim sewa beli bagi Program Perumahan Rakyat untuk membolehkan penyewa memiliki rumah tersebut setelah memenuhi syarat-syarat tertentu. Jika ya, nyatakan skim yang diperkenalkan di negeri Sabah khususnya kawasan Sandakan.

JAWAPAN :-

Tuan Yang di-Pertua,

Untuk makluman Ahli Yang Berhormat, Kementerian Kesejahteraan Bandar, Perumahan dan Kerajaan Tempatan (KPKT) sedang menjalankan kajian mengenai pelaksanaan kaedah sewa untuk beli (*Rent to Own*) bagi Program Perumahan Rakyat (PPR). Hasil kajian berkenaan seterusnya akan dikemukakan kepada Kerajaan untuk pertimbangan dan persetujuan.

Kementerian Kesejahteraan Bandar,
Perumahan dan Kerajaan Tempatan

November 2014

PERTANYAAN LISAN DEWAN RAKYAT

PERTANYAAN : LISAN

**DARIPADA : Y.B DATO' ABDUL MANAN BIN ISMAIL
(PAYA BESAR)**

TARIKH : 24 NOVEMBER 2014

SOALAN : Y.B. DATO' ABDUL MANAN BIN ISMAIL minta **PERDANA MENTERI** menyatakan sejauh manakah dakwaan kebenaran pihak tertentu yang melihat kegagalan Kementerian dalam menangani insiden yang boleh mengganggu-gugat perpaduan rakyat berbilang kaum terutama pada era perkembangan pantas teknologi maklumat dan komunikasi (ICT).

JAWAPAN :

Yang Di Pertua,

Proses merealisasikan perpaduan nasional bukannya proses yang mudah dan hanya boleh dihasilkan dalam masa yang singkat. Ia adalah usaha yang perlu dilaksanakan secara berterusan dan akan terus menjadi perjuangan yang akan diwariskan dari generasi ke generasi.

Kerajaan melalui JPNIN sedar bahawa kemajuan teknologi terkini ada kalanya membawa kesan negatif jika tidak dikawal dan tidak mematuhi etika sewajarnya dengan melemparkan serangan berbaur perkauman oleh individu atau kumpulan tertentu terhadap agama dan kaum.

Atas dasar tersebut, JPNIN selaku agensi yang dipertanggungjawab untuk memelihara, mengekal dan meningkatkan perpaduan sentiasa berusaha bersungguh-sungguh untuk melahirkan masyarakat Malaysia yang bersatu padu.

Kerajaan melihat bahawa usaha memupuk perpaduan tidak hanya dipikul oleh masyarakat agensi semata-mata. Semua pihak perlu bersama menggembelng sumber dan tenaga agar tindakan dilakukan secara bersama tanpa mengira kaum, aliran pemikiran, agama, sosio-ekonomi dan sebagainya. Ia adalah tanggungjawab bersama.

Kerajaan hari ini adalah kerajaan yang berkhidmat untuk rakyat sesuai dengan slogan "Rakyat Didahulukan". Kerajaan amat mengalu-alukan pandangan dan cadangan daripada semua pihak berkepentingan agar Malaysia yang kita cintai ini akan terus kekal aman dan sejahtera untuk diwarisi kepada generasi akan datang.